

## Apa Berlaku Selepas Pilihan Raya

26 Oktober 2012

Ketika undi masih dikira pada 4 November 2008, kedua-dua calon utama untuk jawatan presiden A.S. memainkan peranan mereka dalam penamatkan drama politik. Calon yang kalah, John McCain, adalah yang pertama berucap.

Ucapan penerimaan kekalahan beliau mengikuti formula retorik yang tak lekang dek masa: "Kawan-kawan, kita telah sampai ke penghujung perjalanan yang panjang. Rakyat Amerika telah bersuara, dan mereka telah bersuara dengan jelas. Sebentar tadi, saya mendapat penghormatan menghubungi Senator Barack Obama untuk mengucapkan tahniah kepada beliau ... kerana dipilih menjadi presiden untuk negara yang kita cintai. Senator Obama dan saya telah bertikam lidah mengenai perbezaan kami, dan beliau telah menang. Namun kami masih berbeza pendapat dalam banyak perkara. Ini adalah masa yang sukar bagi negara kita, dan saya berjanji kepadanya malam ini berusaha sedaya upaya saya untuk membantu beliau membawa kita mengharungi cabaran-cabaran yang kita hadapi. "

Dalam ucapan kemenangannya, Barack Obama menjawab, dengan menekankan "kita bukan sekadar kumpulan individu atau kumpulan negeri merah [kebanyakannya Republikan] dan negeri biru [kebanyakannya Demokratik]. Kita adalah, dan sentiasa, Amerika Syarikat." Presiden yang dipilih seterusnya memberikan kata-kata penghormatan ini kepada lawannya: "Awal petang tadi, saya menerima panggilan hormat yang luar biasa daripada Senator McCain. Senator McCain telah berjuang begitu lama dan berusaha keras dalam kempen ini. Beliau berjuang lebih lama dan sukar untuk negara yang beliau cintai. Beliau telah melakukan pengorbanan untuk Amerika yang kebanyakan kita tidak boleh bayangkan. Keadaan kita menjadi lebih baik atas khidmat yang diberikan oleh pemimpin yang berani dan tidak mementingkan diri sendiri ini."

### PERALIHAN SAH

Proses peralihan bermula dengan ucapan penerimaan kekalahan oleh calon yang kalah. Kata-kata ini memainkan peranan penting: calon yang kalah menerima kesahan keputusan pilihan raya, dan pada masa sama beliau memperbaharui komitmen parti untuk menang pada masa depan. Ucapan penerimaan kekalahan yang disampaikan dengan persediaan yang minimum dan kekuatan personaliti pada masa tekanan emosi yang tinggi, memperkuuhkan komitmen negara bagi kestabilan sosial dan kuasa politik yang sah.

Tidak lama selepas itu calon yang menang menyampaikan ucapan dengan memperakui ketinggian budi lawannya. Jawapan beliau memberikan mesej bahawa penyokong-penyokong bagi semua calon adalah penting sebagai sebahagian daripada tatanegara nasional. Setiap pilihan raya, tidak kira betapa hebat ia dipertandingkan, berakhir dengan kata-kata yang menggalakkan perpaduan nasional.

Pilihan raya A.S. diperjuangkan dengan bersungguh-sungguh. Namun rakyat menginginkan pilihanraya yang adil dan keputusan yang dihormati, dengan peralihan kuasa yang aman daripada seorang pemimpin kepada pemimpin seterusnya. Ini bukan sahaja bagi jawatan presiden, tetapi juga untuk pilihan raya bagi Kongres, gabenor negeri dan badan perundangan, dan bagi pilihan raya tempatan.

Rakyat menerima keputusan pilihan raya yang mengecewakan apabila mereka memahami bahawa undang-undang dikuatkuasakan secara adil dan bahawa pandangan mereka mungkin menang dalam pilihan raya berikutnya. Keputusan pilihan raya diterima apabila rakyat melihat kerajaan mereka sebagai kerajaan yang sah kerana ia mematuhi peraturan.

## **PERALIHAN MENCABAR**

Dalam tempoh kira-kira 75 hari antara pilihan raya dan pelantikan Presiden baru A.S., pentadbiran sebelumnya memberi penerangan kepada pentadbiran pengganti mengenai perkara penting keselamatan negara, hal ehwal luar negeri dan perkara-perkara lain. Ini memberi kuasa kepada presiden baru untuk membuat keputusan sebaik saja beliau memulakan tugas. Ia juga membantu presiden dipilih membuat keputusan berkaitan jawatan pegawai atasan. Seorang presiden baru mengisi kira-kira 7,000 jawatan cabang eksekutif; 1,200 jawatan yang paling penting - termasuk setiausaha negeri dan pertahanan - memerlukan pengesahan Senat.

Proses peralihan mencabar mana-mana sistem politik. Dalam sistem demokrasi yang sihat, pilihan raya yang adil dan proses peralihan yang aman menunjukkan bahawa orang yang kalah hari ini mungkin menjadi pemenang hari esok. Pemenang dan penyokong mereka mesti kekal responsif terhadap pendapat pesaing mereka, dengan bersiap sedia untuk proses pilihan raya seterusnya.

Calon yang kalah dan penyokong mereka boleh memberi tumpuan kepada kemungkinan masa kini dan masa depan, bukannya menyimpan rasa tidak puas hati. Mereka harus yakin bahawa peraturan akan menguntungkan mereka pada masa yang akan datang. Mereka juga perlu menerima aturan politik sedia ada dan tidak menggunakan keganasan.

Penjawat yang tewas dalam pilihan raya melepaskan kuasa dengan hormat dan aman. Dengan berbuat demikian, maruah mereka tidak tercalar dan menjadi contoh dalam pengukuhan tradisi demokratik negara mereka. Dengan mendekati lawan politik dan menunjukkan rasa hormat kepada mereka, calon yang menang juga membantu merapatkan jurang perbezaan dan meminimumkan potensi konflik yang boleh menjaskan demokrasi.